

REGULAMENTO ORGÁNICO DOS DEBATES EN PLENO E ÓRGANOS COLEXIADOS DO CONCELLO DE SALVATERRA DE MIÑO

TÍTULO I

Artigo 1.- Obxecto.

De conformidade coas potestades regulamentaria e de autoorganización atribuída ós Concellos pola lexislación de réxime local, o presente regulamento ten por obxecto establecer o réxime de funcionamento do Pleno e demais órganos colexiados necesarios e complementarios municipais do Concello de Salvaterra de Miño.

Artigo 2.- Lexislación aplicable.

1. Este regulamento orgánico, a lexislación básica estatal na materia e lexislación autonómica sobre o réxime local conforman as fontes normativas de organización e funcionamento do Pleno, e demais órganos colexiados necesarios e complementarios municipais.

2. Teñen carácter supletorio en todo o non previsto no presente regulamento, e sempre que non se opoña a esta regulación, as normas non básicas ditadas ou que puidesen ser ditadas polas administracións estatal e autonómica.

TÍTULO II

Artigo 3.- Do Pleno.

O Pleno é o órgano de máxima representación política da cidadanía no goberno municipal. Está integrado por tódolos concelleiros e é presidido pola Alcaldía.

Artigo 4.- Clases de sesións.

As sesións do Pleno poderán ser ordinarias, extraordinarias ou extraordinarias urxentes, segundo a definición que de cada unha delas efectúa a lexislación sobre réxime local.

Artigo 5.- Dos debates do Pleno.

Correspóndelle a Presidencia dirixir os debates, manter a orde neles, cumprir e facer cumprir o presente regulamento interpretándoo nos casos de dúbida, co auxilio do/a secretario/a xeral do Concello, e suplíndoo en casos de omisión.

Artigo 5.- Intervencións dos membros da Corporación.

Ós efectos do desenvolvemento das sesións e para definir o carácter das intervencións dos membros da Corporación, utilizaráse a terminoloxía prevista na lexislación do réxime local, respecto dos dictames, proposicións, mocións, votos particulares, enmendas, rogos e preguntas.

Artigo 6.- Deliberacións.

1. Para os efectos das deliberacións, se unha vez explicado ou lido o dictame pola secretaría municipal, proposición ou moción polos proponentes e as respectivas enmendas por quen as presentasen, actuación para a que se disporá dun tempo máximo de cinco minutos, as e os membros da Corporación desexan facer uso da súa palabra promovendo debate, a Presidencia ordenará as intervencións conforme ás seguintes regras:

a) Só se poderá facer uso da palabra logo da petición e autorización da Presidencia.

b) Intervirán, sucesivamente, o/a concelleiro/a propoñente e a continuación os diferentes grupos políticos por orde de menor a maior representatividade, nunha primeira quenda de palabra que terá unha duración máxima de 5 minutos para cada un/unha dos/as intervinientes, con excepción, de ser o caso, dos grupos políticos que intervisen presentando a moción. As e os concelleiros/as non adscritos ou, no seu caso, o/a representante do Grupo Mixto, farán uso da palabra en primeiro lugar.

c) Pechará a quenda, respondendo ás intervencións anteriores, o concelleiro/a propoñente que ratificará ou modificará a súa proposta, cun tempo máximo de tres minutos.

d) Se o solicitase algún grupo, a Presidencia permitirá unha segunda quenda de palabra, na que novamente intervirán os grupos políticos pola orde establecida no primeiro turno.

e) Pechará a segunda quenda o/a concelleiro/a propoñente que brevemente ratificará ou modificará a súa proposta nun tempo máximo de dous minutos.

f) Rematada a segunda quenda, a Presidencia poderá realizar a súa intervención e declarar rematado o debate. Só por alusións, calquera concelleiro/a poderá solicitar da Presidencia a palabra. De serlle outorgada, fará uso desta de xeito moi breve e conciso, cunha duración máxima dun minuto.

g) Concluído o debate someterase o dictame, proposición ou moción a votación.

h) Se o membro dalgún grupo que non participase no debate ou quen votasen no sentido contrario ó do seu grupo, solicitara o uso da palabra para explicación de voto disporá dun tempo máximo de dous minutos.

2. Cando o asunto a tratar sexa o orzamento ou a conta xeral, os tempos das intervencións sinalados no apartado anterior serán acordados polos Portavoces dos grupos políticos municipais.

3. As intervencións do Grupo Mixto terán lugar a través dun só/a concelleiro/a, que poderá ser distinto/a en función do asunto que tratar, tralo acordo no seu seo adoptado para o efecto.

Artigo 7.- Enmendadas.

De presentarse enmendadas, a Presidencia ordenará as intervencións conforme ás mesmas regras e tempos que os sinalados no artigo anterior.

Artigo 8.- Chamada á cuestión e á orde.

1. Durante o debate non se admitirán máis intervencións que as da Presidencia para chamar á cuestión debatida cando se desvíe o debate do asunto principal, cando se volva sobre cuestións xa deliberadas e votadas ou ben para chamar á orde e/ou advertir que se esgotou o tempo ou que se carece do uso da palabra. A Presidencia chamará a orde ó/a concelleiro/a que profira palabras ou conceptos ofensivos para a Corporación, para os seus membros, para institucións públicas ou para calquera outra persoa ou entidade.

2. Se unha ou un concelleiro/a é chamado tres veces á orde nunha mesma sesión, a Presidencia, con advertencia na segunda das consecuencias, poderá expulsalo/a do Salón de Plenos.

3. Se por calquera causa, durante a realización da sesión se producise unha alteración da orde pública que, a xuízo da Presidencia, impidise o normal desenvolvemento da sesión, poderá ordenar a súa suspensión polo prazo máximo de media hora.

Se transcrido este prazo, non se pode continuar normalmente, a Presidencia optará por reanudala a porta pechada ou por levantala definitivamente. Neste caso os asuntos que queden pendentes terán que ser tratados noutra sesión que terá lugar dentro dos dez días hábiles seguintes co mesmo carácter que tivese a que se suspendeu.

Disposición Final Primeira.

As disposicións do presente regulamento serán de aplicación a calquera órgano colexiado, necesario, complementario ou instrumental de carácter administrativo, dependente do Concello de Salvaterra de Miño que deban someterse ó réxime xurídico local.

Disposición Final Segunda.

Este regulamento entrará en vigor unha vez sexa publicado o texto íntegro no Boletín Oficial da Provincia e cando teña transcrido o prazo previsto polo artigo 65.2 da Lei 7/1985, do 2 de abril, reguladora das bases de réxime local.

E así elévase, por esta Alcaldía ó Pleno da Corporación, para, tra-los informes oportunos, sexa tomado acordo polo órgano competente ó respecto.

En Salvaterra de Miño, 28 de novembro de 2011.
O Alcalde

Asdo: Arturo Grandal Vaqueiro